

## 九、附五父十三母图说

谨案吾学錄云三父八母一图创於元典章自明至今皆因之徐氏乾学读礼通考疑其未备谓既列嫡母继母则不当去亲父母嗣父母本生父母为更定五父十三母之图五父者父也所后父也本生父也同居继父也不同居继父也十三母者母也嫡母也继母也所后母也本生母也慈母也生母也养母也庶母也嫁母也出母也从继母嫁也乳母也其说甚辨然此图既附律文自当属守未便据一家之言轻为更易但其中所列从继母嫁一条原註齐衰杖期通礼改齐衰不杖期律图仍前之舊通礼成於道光四年当以今定者为据养母一条始於宋开宝礼註谓收养遗弃三岁儿服齐衰期年明孝慈錄改註云谓自幼过房与人服斩衰三年今律图並会典皆仍其舊通礼凡例云既与为人后者为所后父母持服务混且恐开乱宗之渐奏交大学士九卿议定改从宋开宝礼原註定服齐衰期年以符名义並將抱养子从姓者为养父母持服一务附载以上二条今谨从通礼改定而附著其义於此其五父十三母一图亦附本图之后以资考證云